

葵青居詩錄



叢書集成初編

(補印本)

葵 青 居 詩 錄

一九三九年十二月初版  
一九六〇年五月補印

石

渠

著

商務印書館出版

上海大東集成分刷廠印刷

本館據滂喜齋叢  
書本排印初編各  
叢書僅有此本

# 葵青居詩錄

斷存集

清 吳縣石 渠梅孫著

黃同叔丈壽鳳凰題尊甫墓圃先生問梅詩社遺冊卽步冊中家琢堂師原韻

老成負夙望。風雅垂家聲。繫余到門晚。未獲親平生。披圖一振觸。懷舊無限情。我祖與而翁。曾結歲寒盟。後先互凋謝。零落拾餘英。契好在昔年。人亡交不更。遺卷藏篋衍。後輩歌載賡。問梅梅無恙。所慚鳴鶴鳴。睇雲圖予從母之夫祝芷鄉丈爲悼亡作也。越今二十年索賦感題。

鏡臺一分手。天際擁雲軒。曹植洛濱賦。襄王夢裏魂。傷神空鼓瑟。破涕且開樽。爲報重泉曉。于今已抱孫。我欲披圖看。悲懷慘不支。可堪題畫者。正是悼亡時。愁緒當年結。嚴冬此味知。寒雲方滿目。何處話情癡。和張研孫鴻基夢經野塘見白蓮作

野塘一抹漾虛明。花葉因緣夢裡成。便是瞿騰多變幻。依然冷淡見平生。文章不露才真絕。色相俱空界愈清。桂子無緣蓮性在。好從白社證前盟。來書有云桂花與我輩無緣

淡月微濛水不波。吟魂彷彿此經過。託根本是塵難著。傅粉還嫌色未和。青眼如君眞賞少。素心似我別愁多。並頭那得頭同白。唱到蓮儂喚奈何。

題王耕畬士錦茂才望山圖

迢迢山前路，鬱鬱山中柏。廬墓有時返，思親無日釋。繪圖寄所思，滿紙淚痕積。始知陟屺帖，生死無異迹。展卷見孝思，因之感先德。尊甫人中豪，稜稜擢傲骨。鯉門先生名元長，以諸生吳三省案，同時被逮者數十人，事白獨先生與馬昭賢仁虎遺戍士林義之。往者諸生獄，庠序困羅織。先生奮然興，挺身當其厄。陳東坐舉旌，范滂冠黨籍。義與雲霄並，身爲同袍屈。豈但人子心，霜露懷明發。人望之所歸，高山不可即。

李藝齋僚婿悼亡詩題後

寒風吹折窗前竹，黯入孤燈人獨宿。未解當年失侶悲，淚痕乾處眉猶蹙。悼亡新什脩傳來，語語傷心字字哀。爲我愁深無自遣，知君腸結那能回。回腸百結心如擣，五載良緣真草草。蕭陸叨聯共袂親，芳儀我已聞之早。香閨少小婉清揚，阿妹相隨阿姊旁。拜月分攜羅袖薄，穿鍼共引彩絲長。穿鍼拜月休留戀，先後郎家咏鳴雁。寶馬香車邈邈來，萍花橋畔藏深院。三月羹湯手自調，融融色養日方饒。布裙不羨羅紩麗，椎髻還能井臼操。罷操井臼銀燈續，鍼黹蘭窗伴宵讀。和鳴合比繡鴛鴦，百歲方長嫌未足。一夕驚傷比翼羣，一朝唱出孤飛曲。孤飛別淚灑西風，花已辭枝水又東。此際追歡歡盡散，此時引恨恨難窮。前年我自悲長逝，秋蟀春鷗渺佳致。兔毫禿盡麥光殘，難訴鰥魚無限意。聞說閨中念姊心，一編傳誦曾垂涕。誰知爐簾乍經年，姊妹牽連赴九泉。一絃一柱華年數，又見君家錦瑟篇。去歲窮冬正飛雪，君曾爲我情淒絕。今歲冬來雪欲飛，我更爲君腸暗裂。同是閒居作賦人，那堪相對愁情說。漫把愁情眷別離，同牀各

夢境差池。花紅雪白男兒在。便是尊前慰解時。

黃同叔丈與其姪飲魚美鎬移居乘馬避巷索詩得七律二首

人境居然結宅幽。一廬百宋想前修。底須廳事能旋馬。尚有奇書足汗牛。彭澤素心饒隱趣。稚川眷屬盡仙流。北堂並喜春暉永。笑口常開到白頭。  
烏衣門巷落花香。到處能成翰墨場。交愛竹林如水淡。地連槐市待花黃。昔年曾讀移居畫。今日重賡伐木章。從此清嘉里居近。好隨巢燕往來忙。

題望山第二圖

一抹松楸望裏勻。淚痕應共墨痕新。不堪把卷今重讀。我亦喬柯失蔭人。  
芒鞋踏破幾斜陽。歷盡巖阿路短長。輸爾佳城能早築。河山一角鬱青蒼。

蕉窗夢冷圖

繩牀經卷夢低徊。多感檀奴序玉臺。吹徹瑤笙人不見。蕉陰依舊上窗來。  
綠天深處慣臨池。鬢影春風憶舊時。此日可憐愁莫展。抽來一葉一相思。

陶宮保印心石屋

一德符昌運。賢臣慶嶽生。穀貽惟孝友。世篤是忠貞。都督源流盛。長沙族望清。碧蘿新畫本。紅藿舊灘聲。  
碩輔今開府。先公此息耕。書嘗親手授。石記印心名。鯉對叨庭誥。鴻儀叶國楨。秋香攀桂籍。春暖泛蓬瀛。

喜射金階策。華簪玉殿纓。奇才推李嶠。佳句說韓翃。冰向漕河禱。文從蜀道衡。  
九重知素行。廿載耿丹誠。夔戀彤庭舞。鷗閒白水盟。眷深頻晉秩。材大佇調羹。  
自建江東節。曾瞻道左旌。羊君言慎密。呂相度和平。鹽法疏能鬯。堤工靜不驚。  
三江傳績茂。萬口勒碑成。宣室俄陳事。單車亟啓行。槐班依鷺序。薇省聽雞鳴。  
虎拜朝儀肅。龍顏霽色呈。恩綸承處近。世系述來明。里志桑還梓。年光蟀間鷗。  
田園欣好在。堂構勉重營。奉詔新恩渥。傳經夙感縈。溫詞邀帝聽。佳話入廷評。  
聖度涵無外。皇衷鑒至情。瑤章宸翰灑。銀紙御香盈。寵拜堯階賜。親從舜陞擎。  
千秋詩禮澤。四字古今榮。丹闕朝辭鳳。青門暮繪鯖。兩行迴檠戟。雙旆引歸程。  
北路星占使。南轅月耀卿。張來歡比戶。寇借遂羣氓。錦帶開平政。珠旗待閱兵。  
鸛鵲軍欲簡。猿鶴駕遲迎。舟楫匡時切。鄉關入夢輕。山川雄楚地。絃誦接吳城。  
圖效文翁繪。歌慚下士賡。雲祲看奕葉。長此毓奇英。

飲魚自題其夫人李定之慧生畫冊

清辭妙繪總成雙。幅幅花箋小著行。卻笑當年文淑筆。留題幾見趙家郎。  
幾人豔說買春回。筆底花枝頃刻開。可怪入門常給爾。不曾持得一錢來。

貞婦王氏詞

蓬山天遠離鸞弔。貞魂來往京江道。三尺苔封護紫泥。春風不長紅心草。  
王娘義烈古來稀。賴有神明爲表微。閒向棠陰談軼事。琵琶譜出泪沾衣。  
婦家卻住丹徒地。自小蓬門徵秀異。讀史何知趙母賢。聞歌每

歎陶嬰義于歸早見賦桃夭。吹徹求凰是鳳簫。春色玉臺鸞舞鏡。秋期銀浦鵲填橋。入門漸識傷心味。百計承歡歡不易。好女方悲作婦難。旁人偏識慈姑意。前生應是孽緣深。結得黃冠世外因。阿姥那知憐白壁。道人祇解擲黃金。女貞每被置風妬。打鴨驚鴛朝復暮。濁水難從淨土流。暴雨莫測高堂怒。頻通芳訊到妝樓。可恨登徒抵死謀。飛絮儘隨新燕舞。名花肯被晚鴛偷。從此舅姑都不悅。從此貞姬愈修潔。曉汲惟容水鑑形。夜眠不許風排闥。大歸里黨爲銜冤。小故蒸梨奈可援。紫鳳頓看穿籠去。蒼蠅還肆集樊喧。孤鸞遽反慈烏哭。羈雌便擬鴛鴦續。女志偏同鐵樹堅。娘心枉是燈花卜。經年掩恨守空閨。淚盡閒階碧化苦。忽地香車重促駕。畫眉還傍舊妝臺。殘更催夢秋燈黑。何物蛇行到牀側。穿穴徒勞黠鼠工。絕裾還仗驚鴻力。仰天一慟恨如何。顧此微軀值幾多。九死忍教蠅玷壁。半生已等雉罹羅。愁來祇覺人間仄。茫後路惟沾臆。一曲酸聲黃鵠吟。三生薄命紅絲石。腸斷羅衣手自縫。蛾眉臨死計從容。拚將蟻命酬夫壻。偷得鴆醪自阿翁。蘭香一霎塵緣絕。銀蟾匿影蒼龍泣。倩女魂方蛺蝶離。有人夢正鴛鴦熱。風聲肯使婦家聞。奔赴惟言病莫名。鵲噪鳴張情慣遁。鴛鴦毒鳳事難明。是非苦爲羣言亂。匆匆竟了琴堂案。鐵索何曾逮羽流。桐棺早見埋荒岸。寶娥齋恨幾時伸。里黨同聲感不平。奇節自來天亦憫。洗冤可歎吏無人。攔街竹馬兒童笑。烏臺恰喜周新到。削牘方憂狀莫求。覆盆誰信冤能照。飛符一夕過江流。漏網鯨鯢看坐收。政肅豚魚多革面。讞成鬼蜮只低頭。邪蒿那禁風霜疾。刑章早正鋤奸律。白簡朝伸獬豸心。赭衣夜飽螭螭血。維持風化古懷存。更聽陳詞叩紫閣。激濁揚清王者政。褒貞獎烈聖人恩。降來芝檢青雲上。豐

碑突兀看相向。黃絹誰題幼婦詞。紅妝自表傳人樣。冰清雪豔鎮千年。青史他時合共編。太息秀姑終洩憤。還因劉寵不名錢。眼中敢說循良少。文書可奈多顛倒。花縣但求狴犴清。蘭臺慣畫葫蘆藁。于公明察古來無。快舉時時誦士夫。按部聲清今廌服。摘奸才大古龍圖。自來賢婦多難及。往事愁提震川集。桃李方悲繡閣僵。葡萄已報官衙入。黑雲蔽日幾多時。始見秦臺正獄詞。俗吏但知營賂急。幽魂應復讐遲。古今合唱傷心調。官清所喜能除暴。弱女偏知節烈扶。大賢恍有神明告。秋風芳里恨曾經。何處高墳毅魄停。一唱杜鵑紅淚溼。不堪山色古來青。

家祠在石湖越城橋之東。今冬葺其旁室。鑿壁設窗。全湖見焉。因摘坡翁句顏其室曰好湖山處落。成喜賦。

故鄉無此好湖山。卻有湖山一碧環。分外光明窗四面。天然位置屋三間。漁村孤隱秋雲白。

祠南有漁家村。

塔影

雙懸夕照殷。

靈巖塔亦在望。

何日移家朝暮住。夢魂常伴野鷗閒。

故鄉無此好湖山。坡老當年一遇慳。溪姓不須因我改。墩名未免笑予頑。探梅客至春移棹。寓讀人來晝閉關。無分南園能乞取。結廬且喜隔塵寰。

自題三十九歲小照

封侯豈是此頭顱。四十年華過隙駒。有限光陰消筆墨。無聊身世託菰蘆。不傳人口文焉用。差慰親心病。漸蘇。倘約石湖偕隱去。一船準擬檣頭租。

此錯真如鑄鐵同。仙山才到引回風。敢誇猿臂偏能射。強畫蛾眉總未工。乾陰竟摧傷李燮。帥資難得是揚雄。人天一種酬知淚。迸入思親痛哭中。

那得金鍼度後生。臯比謬擁竊虛聲。偶然選石非關癖。隨分臨池豈爲名。雪裏孤蹤憐野鶴。花間巧語笑流鶯。敢將恩怨分明說。濁酒尊前且自傾。

尋歡懶逐少年場。室有琴書味自長。世事任他雲變幻。天倫容我日徜徉。半間老屋三分竹。兩代詩名一瓣香。欲乞新詞灑珠玉。羞將糠粃向風揚。

戲題閨人二十八歲小影

小立亭亭笑欲呼。眉痕鉤月上新圖。玉臺賺得重圓鏡。莫向溫郎喚老奴。婦故爲予中表親

量鹽課米尋常事。繡鳳描鸞未足誇。卻記漁洋詩句好。不教兒女衣蘆花。

九轉丹成望眼穿。無緣拔宅作飛仙。青衫我已添蕉萃。一種癡情又七年。一塔楞伽現樹端。石湖煙雨畫中看。他年若遂扁舟約。卿製荷裳我釣竿。

不寐

夜窗蕭冷不成眠。病骨支離倍黯然。添得庭陰蕉一本。秋聲常滿枕函邊。

病起示芝孫

一病荒涼百感生。此身退步未分明。世情豈必秋雲薄。我意先爲落葉驚。學不到家由志短。人當失路要

心平夜窗燭燼言難了。還聽歸鴻月下聲。

寫懷東飲魚

家業飄零仗一身。那堪宿疾復逡巡。全無意興惟餘懶。縱有文章不療貧。捫蝨敢談天下事。登龍只讓少年人。比來止酒愁難解。賴爾交情似飲醇。

雪中泛舟至石湖祠舍同毛珍亭妹夫農生家叔省補漱六兩弟

冷氣逼孤燈。寒聲戛庭竹。竟夕如蠶眠。重衾不煖足。曉來倦未起。老婢爲余告。昨宵漫天雪。紛紛尙飛落。披衣急開門。積素滿林木。因鼓扁舟興。呼伴相追逐。數錢市豚蹄。移棹出城郭。曖曖胥江渡。家家門下箔。兩岸悄無聲。惟見林容肅。飢鴉飛不高。墨點團幾簇。紅牆界玉帶。微辨禪林屋。疏枝忽添肥。虬龍怒欲攫。平疇白無際。瑣碎露寒綠。冒冷倚篷窗。奇景看起伏。窗隙當紙闌。頃刻畫千幅。入門謁先靈。舍舟橋頭泊。煖酒累十觴。飽飯興重屬。虛櫺齊高挂。憑欄恣遐矚。兩三漁舟外。彌望惟漠漠。山骨沒峻嶒。一塔凌霄矗。天上白玉樓。疑卽人間琢。吳中稱大藩。生此庸非福。誰知連歲荒。瘡痍未全復。三白兆豐年。眼前轉窮蹙。編茅支一椽。積重恐傾覆。使有隔宿糧。過此將焉續。我輩趁閒遊。徧地看如玉。安得箋天公。化作千鍾粟。

有感

認是三生杜牧之。綠楊影裏趁鞭絲。春來一入揚州夢。便到清秋醒不知。

寄懷珍亭

款款深情一片持。十年戚好此連枝。多情曲突常參議。愧我勞薪不任炊。鬪酒最難當勁敵。看山曾許結新知。欲將情話殷勤訴。近局招邀想未遲。

徐吉人妹夫悼亡

撥上瑤琴曲不調。頓教潘令髮蕭蕭。前身豈解天花散。弱質偏隨木葉凋。大抵賢勞多命短。全憑詩句當魂招。繩牀曾下鰥魚泪。可算知音話寂寥。  
清歌一曲雉朝飛。十五年頭事事非。齋奠猶虛元相俸。淚痕莫上老萊衣。愁聽妙子林間喚。幸有佳兒膝下依。新婦玉臺方聘得。好留鍼線繫慈暉。

鵝湖曉泛

澄波一碧漾朝暉。柔櫓聲中靜不喧。行盡清溪村落見。此鄉合喚小桃源。

子方凍生

天道貴大生。人道重似續。多男誠多累。無子哀瑩獨。我年交四十。充閭尙空祝。不繼商瞿蹤。恐追鄧攸躅。爾今居然生。墮地嗶嗶哭。我母色然喜。歡聲動婢僕。是時天雷雨。倏焉淨如沐。親朋入門來。賀我衣冠肅。抱兒上高堂。觀者如雲簇。顧茲眼前景。但覺心根觸。記我初娶妻。踰年異象告。方期掌弄珠。旋見懷投玉。奄忽七年間。四女疊以育。阿父待抱孫。到此空盼矚。阿婦常懷愁。壽命隨之促。迨我再娶妻。轉瞬痛風木。忽忽又八年。蘭夢斷難屬。爾今居然生。爾生胡不速。俗語記故老。有子萬事足。如我遇歡懷。反增淚盈掬。

返哺今無時。雖鸞舊有曲。徒作老牛愛。犁能一舐犢。

游杭道中

朝來解纜趁南薰。纔過盤溪路漸分。一角吳山松萬樹。榜人指是太師墳。  
夾岸垂楊面面風。踏車聲徹路西東。舟行不比丹陽道。盡日泥山屈曲中。  
一路柔桑夾岸栽。暮蟬聲裏夕陽積。林間燈火星星上。知是前村新市來。  
炎歊攪夢不成眠。客況迷離一枕邊。曉起推篷挹西爽。青山齊供水窗前。  
長橋一道臥平堤。萬瓦魚鱗疊疊齊。買得新絲買痧藥。是鄉風物說塘栖。

蔣陶谿天台策蹇圖

帽影鞭絲畫裏逢。桃花入夢太匆匆。漫言叱馭能忘險。卽論詩情亦自雄。  
作尉何妨號謫仙。鴻泥蹤跡有前緣。而今驢背看山穩。更寫尋詩孟浩然。

秋晚過寒山嶺

一步一回翔。秋陰石徑涼。蒼松盤曲磳。紅葉絡危牆。天末已歸鳥。林梢猶夕陽。村農收穫好。稻把擔來忙。

游虞山

城形亘長繩。山形頑若牛。捫蘿入山腹。萬壑而千邱。同伴六七輩。一例坐竹兜。輕如小車騁。幄幕張青油。  
經衣爲導師。曲折視所由。劍門何峭拔。壁立風颼颼。禪房探幽處。名句工雕鏤。拂水有山莊。蒙垢弔蒙叟。

到處縱臨眺。畫圖不勝收。山僧具羹飯。蔬筍適珍羞。愛茲山中寺。尤愛凌山頭。羣峰互起伏。煙霧相沈浮。微雨天忽暝。啼徧林中鳩。夕照絢西嶽。草樹清愈幽。萬綠圍一身。雲影衣上流。好景恐易盡。轉望路阻修。前塵廿年餘。約略覽一周。山靈倘識我。樂哉呼此游。

劉礪香徵世丈以七十述懷詩見示奉和

鶴壽不紀年。松姿古彌隋。先生齒德尊。丰儀清相肖。我年十有七。始識先生貌。先生善屬文。詞壇聲名噪。子舍結文社。摳衣就考校。先生覽我文。謂孺子可教。棄瑕錄其瑜。不惜諄諄告。縱轡向春風。聯鑣入學校。劉石本世交。新知更永好。無何廿年餘。隨身猶席帽。後輩意氣闌。先生愈兀傲。腰腳從人鬪。山水恣游眺。鳩杖不須扶。臨風自舒嘯。有時簡新詩。就我徵同調。有時作小篆。示我皆佳妙。濛濛細雨中。著屐忽逕造。興至日再來。迎門屣爲倒。旁人不識翁。謂翁何騰踔。迨聞年七旬。益驚出所料。始知魯靈光。先生稱其號。星昂逢朔易。懸弧當及隩。一卷述懷詩。平生自寫照。老至筆更健。心虛德益劭。索和及賤子。珠玉愧前導。陰德素耳鳴。諛詞焉敢效。聊敍下交情。追憶及年少。庭梅甫著花。未春蜂先鬧。美意獲延年。予卜勝杯琫。

張誠齋課易小影

悟徹山僧夙世緣。閒從兒輩玩義編。峨嵋莫問前頭路。卽論人間亦散仙。橫海戈船拉雜中。一腔熱血灑虛空。華亭鶴唳聲嗚咽。我亦前身徐闢公。

題程雲門遺藁

雲門故習舉業誓不游庠不娶無何卒聘室倪守貞不嫁其表弟張雪樵撫其事裝成此冊  
高才多抑塞立志彌堅貞聞風起頑懦況乃夫婦情夫婦無一面恩義重死生遺草既哀輯苦節亦光明  
異室而同穴千古留芳名

瑞光寺晚眺同飲魚研孫

一徑入寒翠頓教遠俗氛朋歡閒裏合秋色靜中分塔影搗殘照鐘聲暝暮雲僧寮茶話久歸路悵離羣

程序伯畫冊爲其弟子林少初志鴻女夫題和同叔丈韻

省識丹青有替人莫教妙畫竟通神開緘捉塵時披拂我想當年段去塵

哭次兒方涇

豈是前生種孽緣塵寰七見月輪圓玉京未免趨朝早一朵芙蓉化碧煙  
急影殘年一病過春來漸喜體調和那知杏子塲依舊淚比樓頭夜雨多

病經一霎最難堪祖母青門信未諳何事能增堂上喜偏教反袂哭孫男

時老母在二妹邵宅

命名嘉瑞話夷亭清叔高科姓字馨一紙平原投刺去片時猶自寫方涇

宜男四十已嫌遲纔獲雙枝折一枝曾爲竹林腸斷處隻棺又向石湖祠

豎洲家叔年五十三矣一子甫十二以去冬殤

錦瑟當年引恨長閨人應未舊情忘憐伊襁褓無知覺別向泉臺認阿娘

和韻酬同叔丈

既晴仍復雨。天竟不相憐。頓變凶荒歲。況牽婚嫁緣。菜根須耐苦。米汁且參禪。屋漏牀牀溼。深宵未許眠。

### 水災行

一雨不知止。一止又復雨。一雨二十日。卽水卽是土。舟楫上橋梁。波濤生門戶。釜從高座炊。魚可登牀數。樓居危若巢。穴處困於圉。吳鄉本澤國。至此水爲府。工者輟其工。賈者絕其賈。農民尤可哀。田疇不能伍。插秧并無秧。雖晴亦何補。米價日以高。窮民日以苦。大吏瞿然呼。循例稽文簿。卜日議捐輸。行當俾安堵。記我墮地來。水災凡三覩。嘉慶甲子。道光癸未。吳中皆大水。今災尤甚。遠者甫童孩。近猶詳所處。天災本流行。撫臣賴善撫。我思林文忠。今歸在何所。

### 劉研青廷楨席上話舊口占

玉樹庭階傍大椿。萱闈我亦慶芳辰。與君異姓如昆季。同擷芹香三十春。

### 宿九龍塢

山居常起早。雨意迢遙天。雲抹巖腰樹。風沈屋角煙。看碑苔淨掃。覓酒竹深穿。歸路聞琴筑。剛添石上泉。

### 感事

吳越分藩記廣陵。豪情土水一齊興。南園芳草年年綠。古墓有人窺漆燈。廣陵王墓在九龍塢。嘉慶道光發其事。漸反故地。杯土甃石勒石表焉。閭鄉人盜其地。略盡吳中子姓。

副使猶名舊住街。佳城忍便沒荒厓。分明高敞行營地。臥道惟存沒字碑。城東孔副使巷。爲明孔鏞故宅。墓亦在九龍塢。前數年幾爲鄉

人夷去以認得保而墓碑磨盡無一字矣

展毛氏家祠

行到禪關路盡平。空山廟貌仰重營。英靈自古無生死。忠義於今見弟兄。隔竹嵐光當戶綠。過牆泉水入池清。莫言此地嘉魂魄。青史常垂身後名。始祖毛吉死事粵西有附魂還餉事見湯文正明史葉維張明人祠有湯文正區弟爾張諸生聞國變縊死于祠

下堯峰

山行不知處。一徑踏寒綠。古寺渺何方。微辨林間屋。屋小不容佛。金身幾卷曲。閒庭臥廢鐘。款識粗可讀。鐘爲明范允臨同妻某氏捨以祈嗣四望無房寮。當階空躑躅。荒落來幾年。誅茅待重築。初地不饜游。振衣上層麓。

中堯峰

行行步漸高。鋪地徧短松。山勢平而曠。山形廓乎容。置身疑絕頂。盤紆仍數重。果否避水患。堯時登此峰。邐迤歷山脊。石塔峙其東。何來睥睨狀。卽之迺垣墉。其中無一樹。殿宇更空空。徒留盤蛇勢。百丈任橫縱。聞昔全盛日。萬履隨鳴鐘。一自建茲塔。敗如墜隕風。埋骨雖有地。僧侶逃無蹤。主僧葬塔中塔旁石坎四爲大眾叢葬所欲叩風水說來往無人逢。感此重眺望。白雲回首封。

上堯峰

上方何處所。乃在山之陽。峰回露寺宇。林木鬱清蒼。拾級進山門。曲折循回廊。雖無金碧相。修整自法堂。